

71 Centime 1620

32

(254)

4293

LETTRE
DE
MONSIEVR
LE NONCE
DV PAPE,

A la Reyne Mere du Roy

Traduitte d'Italien en François.



1277
OR

A PARIS,
Par ANTOINE ESTIENE, Imprimeur
ordinaire du Roy, rue S. Iacques,
pres S. Yues.

M. DC. XX.

33



LETTRE DE MONSIEVR
LE NONCE DV PAPE,

A la Reyne Mere du Roy.



ADAME,

Il n'est pas possible d'exprimer la ioye que sa Saincteté receut l'année passée, quand elle apprit l'heureuse reconciliation qui se fit entre vostre Maiesté & le Roy son fils à leur entreveuë de Tours. Sa Saincteté dessors conceut vne grâde esperance que vostre Maiesté se resoudroit de venir bien tost faire sa demeure aupres du Roy, & que par ce

A ij

moyen venans à vnir vos personnes
 ensemble , vous tesmoigneriez d'au-
 tant plus ouuertement à tout le mon-
 de l'vnion de vos cœurs ; & reſtabliſ-
 ſant la concorde dans la maiſon Roy-
 ale , vous affermiriez auſſi la paix ge-
 nerale de ce Royaume : Mais depuis
 c'a eſté avec vn extreme deplaiſir que
 ſa Saincteté a veu que non ſeulement
 iuſques à ceſte heure on s'eſt trouué
 fruſtré d'un bien que l'on deſiroit ſi
 ardamment , mais qui pis eſt , les pre-
 mieres deſſiances ſont venuës à renai-
 ſtre , & de ces deſſiances-la ſe ſont for-
 mez les meſcontentemens , des meſ-
 contentemens on eſt retombé dans
 les meſmes dangers dont l'on eſtoit
 forty, voire dans des dangers d'autant
 plus grands , qu'ordinairement les re-
 cheutes ſont plus perilleuſes que les
 maladies. Il y a donc quelque temps,
 MADAME , que i'eus commande-

ment de sa Saincteté de faire en son nom aupres du Roy tous les offices que meritoit vne affaire si importante. En suite de ceste commission i'eus l'honneur de parler ces iours passez à sa Maiesté, ie l'exhortay & la suppliay avec les plus ardantes & les plus instantes prieres qu'il me fut possible, de vouloir tascher de son costé à renouër avec vostre Maiesté vne bonne & parfaite intelligence; Je luy remonstray combien il estoit iuste & raisonnable de donner cela à Dieu, à la Nature, à son peuple, à la Chrestienté & à la Religion Catholique, soit dans la France, soit hors de France, & sur tout maintenant en Allemagne, où les Heretiques s'efforcent de l'opprimer; & où sa Maiesté donnant des marques insignes de sa pieté, a promis de luy tendre la main & de la secourir, ce que toutesfois elle ne scauroit faire que

malaisément durant les diuisions domestiques de son Estat. Le Roy me fit responce, qu'il auoit tousiours eu vn grand soin de donner toute sorte de satisfaction à vostre Majesté, & qu'il ne pensoit pas auoir iamais manqué à luy rendre tout l'honneur & tout le respect qui luy est deu, qu'il l'auoit inuitée plusieurs fois à se vouloir approcher de luy, qu'à ceste fin, & pour leuer toutes les difficultez qui s'y pourroient rencontrer, il auoit par trois fois enuoyé M^r de Blainuille vers vostre Majesté, que ce n'estoit point d'elle dont il s'estoit plaint, ny dont il se plaignoit encores, estant trop asseuré de l'affection & de l'amour qu'elle a en son endroict: mais qu'à la verité il auoit grand sujet de se plaindre des mauuais conseils, que luy donnoient ceux qui ne cherchoient que les moyens de la trôper, & d'exciter des trou-

bles sous son nom. Voila en somme
le discours que ie tins au Roy de la
part de sa Saincteté, & la responce que
le Roy me fit. Il resteroit maintenant,
MADAME, que pour satisfaire entie-
rement aux commandemens de sa
Saincteté, ie peusse moy-mesme aller
accomplir aupres de vostre Majesté
l'autre partie de cest office: mais puis
que l'estat present des affaires me re-
tient icy aupres du Roy, ie suppléeray
avec ceste lettre à ce dont ie ne puis
m'acquiter en personne. C'est pour-
quoy, MADAME, ie représenteray à
vostre Majesté les mesmes raisons
pour lesquelles sa Saincteté vous ex-
horte & vous prie de tout son cœur,
de vouloir pareillement apporter &
contribuer de vostre costé, tout ce qui
peut seruir à vous remettre avec le
Roy vostre fils en ceste vnion & cor-
respondance de volonte, à laquelle

vous estes conuïée par tant de considerations, soit du repos particulier de cest Estat, soit du bien public de la Chrestienté. Sur tout sa Saincteté vous coniure d'euitier tant qu'il sera possible, comme i'en ay aussi bien instamment supplié le Roy, toutes les occasions qui peuuent porter les affaires aux extremitez, & obliger d'en venir aux armes. Il n'y a personne, M A D A M E, qui sçache mieux que vostre Majesté de quelle nature sōt les guerres ciuiles, combien peu de pouuoir ont de les terminer ceux en la puissance desquels il a esté de les commencer: combien elles sont pernicieuses aux vainqueurs & aux vaincus tout ensemble, & avec quelle forte de seuerité Dieu a accoustumé de chastier ceux qui en sont les auteurs, & les peuples entiers. Dequoy peuuent bien auourd'huy faire foy, & rendre vn deplorable

ble tesmoignage les playes mesmes de la France, où l'Herésie s'estant introduitte parmy les desordres des guerres ciuiles, elle a tousiours pris ses aduantages, & acquis de nouuelles forces dans la confusion de ces mesmes guerres. Et vostre Majesté n'ignore pas que ceste Monarchie ne pouuoit estre affligée d'un plus grand fleau que de celui-cy, sçachant mieux que moy que les Heretiques de ce Royaume ne tendent à autre chose, qu'à former vn gouuernement populaire directement opposé à la Monarchie temporelle du Roy, de la mesme façon qu'ils en ont desia formé vne autre directement contraire à la Monarchie spirituelle de l'Eglise. Tout ainsi donc que parmy les armes ciuiles & principalement dans la desunion du corps des Catholiques de cest Estat, l'Herésie a pris sa naissance, s'est accruë & s'ac-

croist tousiours de plus en plus : De
 mesme il faut qu'avec la paix de l'E-
 stat, & particulièrement par l'vnion
 de ce mesme corps des Catholiques,
 on vienne à l'abbaisser & à la détruire:
 mais l'ame de ceste vnion ce doit estre
 le Roy, ne faisant avec vous qu'une
 mesme chose. Ce sont, MADAME,
 les considerations que sa Saincteté
 s'est premierement mises deuant les
 yeux, & que depuis elle m'a comman-
 dé de représenter en son nom au Roy,
 & à vostre Majesté. I'eusse grande-
 ment désiré, comme i'ay dit, d'aller
 moy-mesme rendre en personne cest
 office public, & par mesme moyen me
 preualoir de ceste occasion pour don-
 ner quelque forte de preuue à vostre
 Majesté du tres-humble seruice que
 ie luy ay vouié en mon particulier.
 Mais puis qu'il ne m'est pas permis de
 receuoir cest honneur, i'ay prié M^r

l'Archeuesque de Sens de me vouloir obliger de tant, que de satisfaire plus amplement pour moy à ce qui est du premier deuoir, & de me prester encor la main, s'il luy plaist, en ce qui regarde le second. Comme ie ne doute pas qu'avec ce zele & ceste prudence singuliere, que chacun recognoit en luy, il ne s'acquitte trespasamment de l'un, deduisant sur ce mesme sujet plusieurs autres choses importantes, outre celles que i'ay touchées; Je ne fay nulle doute non plus, qu'il ne satisface pleinement à l'autre, veu la particuliere affection qu'il me porte, & que certes il doit à l'estime particuliere aussi que ie fay de son merite, en suite dequoy ie supplie tres-humblement vostre Majesté de luy vouloir donner autant de creance qu'à moy-mesme. Au reste, ie m'asseure que sa Saincteté aura beaucoup de contentement, d'ap-

prendre que le Roy ayt mis entre les
 mains d'un si digne Prelat, & de Per-
 sonnes si qualifiées comme sont celles
 qu'il enuoye maintenant vers vostre
 Majesté, vne negociation qu'on peut
 dire veritablement estre la plus gran-
 de qui se soit présentée de long temps
 dans les affaires de ce Royaume. Je
 prie Dieu qu'il luy vueille donner un
 heureux succez, & qu'il comble vo-
 stre Majesté de ses plus desirables be-
 nedictions, comme ie le souhaite
 d'aussi bon cœur que ie seray toute
 ma vie,

De vostre Majesté,

MADAME,

Le tres-humble & tres-
 obeissant seruiteur.

GVY BENTIVOLE, Ar-
 cheuesque de Rhodes,

De Paris le 3. Juillet 1620.

